

Tayer Worldviews na biblioteca



ORANJESTAD – Entrante dialuna, dia 13 di october, Biblioteca Nacional Aruba ta ofrece un tayer titula 'Worldviews' pa esunnan cu ta interesa con nos mes y otro hende ta wak mundo.

Esaki ta tuma luga na biblioteca na Playa, 5 biaha dialuna anochi.

Un mundo chikito
Nos mundo cada dia ta bira mas chikito. Facilidadnan di comunicacion y transporte ta haci cu den un instante nos ta na altura di loke ta pasa rond mundo, mientras nos mes

por biaha mas leu cu nunca. Esaki ta haci cu nos ta bin cada dia mas den contacto cu personanan di otro cultura y pensamiento. P'esey ta bon pa sa di diferente manera di pensa pa asina conoce e forsa cu ta dirigi nos accion y esun di otro hende miho y tambe pa por respeta otro mas y evita conflicto.

Charla
E ciclo di cinco charla titula "Worldviews" ta haci un recorrido di e maneranan mas comun cu hende tin pa concebi mundo y bida humano na un nivel personal. Lo considera diferente manera

di con nos universo y bida a origina; preguntanan basico y nan contesta cu hende ta confronta diariamente cu nan; cua ta e diferente forma cu tin pa goberna un sociedad; con e produccion y distribucion di producto y servicio ta tuma luga; y con por reduci e grado di speculacion tocante e naturalesa y fenomenon social cu ta rondona nos. Facilitado pa e tayer ta sr. Drs. Herbert Diaz.

Haya conocimiento
Den cuadro di maneho di Biblioteca Nacional Aruba pa ofrece comunidad e oportunidad di lesa y adkiri conocimiento tocante di tur tipo di materia y topico na diferente idioma, obtene informacion educativo y sigui siña pa bida largo ta organisa diferente charla y tayernan durante aña. E cursonan cortico por contribui tanto na desaroyo personal como desaroyo profesional. Esaki pa



hende di diferente edad. E tayer ta riba dianan 13, 20, 27 di october y 3 y 10 di november di 6or pa 8or di anochi. Por registra pa e tayer aki via gjie-sam-foek@bibliotecanacional.aw
Mercado di buki segunda mano
Fuera di esey, awe, dia 27 di

September, biblioteca nacional ta organisando un otro mercado di buki segunda mano. Bishitante y miembro ta haya otro oportunidad di cumpra buki na un bon prijs. Por pasa un rato dilanti di biblioteca na Playa, entre 3or y 7or. Tin buki pa grandi y chikito, de todo un poco. □